

覺後編

下冊

民國十九年一月初版五千部

每部計分上下兩冊



鑒定者 印光法師

編輯者 王克庵

校正者 王雷夏

印刷者 華大印刷公司

藏版處

上海閘北新民路世界佛教居士林
上海北京路慶餘里華大印刷公司

覺後編卷六

清正定王夔立輯

戒色

遏淫說

迪吉錄

明顏茂猷

諸惡業中。惟淫業爲最。蓋淫念一萌。便思邪緣相湊。生幻妄心。設計引誘。生機械心。少有阻礙。生嗔恨心。忌人之有。生妬毒心。奪人之愛。生殺害心。種種善願。由此消。種種惡業。由此起。森此羅鐵榜。必以淫爲萬惡首也。然而庸夫俗子。顯蹈明行。罔知顧忌。至學士文人。誦習聖賢。竟爾自號風流。侈談情種。嬌豔何心。顧盼視輒爲有意之凝眸。深閨不無笑言。便揣作多情之句引。或賄不足餌。而以才誘。或直不能遂。而以巧媒。繾綣則託於夙緣。邂逅便神爲天合。機關不止千般。流毒直兼數世。不思月下花間。爲樂有限。粉白黛綠。轉眼卽空。而惡因日積。顯則傾家蕩產。平生之名利皆虛。陰則削祿減年。一世之榮華喪盡。大則虧體辱親。鄉閭共忿。小則辱身賤行。流落堪嗟。甚至敗露觸凶。而七尺之軀。頃刻作刀頭之鬼。奈世之溺於此者。動曰何傷。嗟乎。

天下受何傷之毒者豈少哉。夫殺人者殺其一身。淫人者殺其三世。蓋穢德必彰惡聲易播。上而殺其父母矣。中而殺其夫矣。下而殺其子女矣。恥懸眉額之間。痛纏心骨之內。無異挾白刃而剖三世之腹。而猶謂何傷。吾誰欺。欺天乎。況昔人親見陰律云。姦人妻者。得子孫淫佚報。姦人室女者。得絕嗣報。試觀好淫之家。不報於妻妾。卽報於女媳。醜聲籍籍。污人聽聞。至若婢女僕婦。尤易行姦。不知家政不肅。家道不和。大都由此。或妒妻鞭撻以傷生。或悍僕反脣以叛主。或父子不知以聚麀。或兄弟交迷而薦寢。甚者以骨肉胞胎淪爲賤賸。後人無知。誤行褻狎。名爲主僕之分。陰有兄弟之戚。傷風敗俗。所不忍言。又有假隨喜之行蹤。誘空門之豔質。敢污佛地。致敗清修。此與尋常淫惡。定加三等。更有別種狂癡。漁獵男色。往往外借朋友之名。陰圖夫婦之好。彼既見鄙於衆人。我亦不齒於正士。且若輩惟慕少年。頓忘齒誼。淫其幼者。何異於吾子吾孫。淫其稍長者。何異於吾弟吾姪。父事兄事之謂何。而淪污若此。少知禮義者。當必汗流浹背。翻然愧悔矣。等而下之。狎優童。昵俊僕。心因欲亂。內外不

分我。既引水入牆。彼必因風縱火。其間蓋有不可知者。他如寄興青樓。自謂於德無損。不知淫娼賤質。百種溫存。無非陷人鉤餌。一入其中。極聰明人亦被迷惑。況遇屍癆之婦。瘡毒之妓。性命莫保。形體臭爛。生子卒皆不育。嗟何及哉。顧巫雲楚岫。幻夢方酣。誰爲喚醒。惟在當境之初。動念之始。亟思降服。能惕然思曰。淫人妻女。妻女亦被人淫。若何。視人之妻。如己妻之惡人犯。視人之女。如己女之惡人污。此爲上也。其次眼光落面。妖態攢心。有慧劍一焉。曰忍而已矣。狠忍而已矣。飢不食虎餐。渴不飲鴆酒。忍之說也。蝮蛇螫手。壯士斷腕。毒矢著身。英雄刮骨。狠忍之說也。要其得力。則又在平日父兄師友訓迪漸染之功。務使胸中於禮法因果。確信不疑。觸境猛省。自能警地迴光。歷觀古之賢達。片刻操持。於己何損。而登大魁。致顯位。享富壽。福子孫。較之半世黃卷青燈。與他途積德累仁者。遂事半功倍。人又何苦以俄頃之歡娛。博終身之荼毒。甘蹈下愚若此哉。第風月場中。最易失足。半生淪墮。顧影慚惶。求其守正不染者。其能有幾。終日戒不淫。淫心特熾。逢人言寡慾。慾種更滋。慾情莫返。自取

貫盈誠始迷而終悔。卽災去而福隨。上蔡先生云。天道禍淫。不加悔罪之人。斯言信矣。然又不但淫行當戒已也。每見讀書才士。與一切伶俐俊少。談及淫污私情。必多方揣摩。一倡百和。每因言者津津。遂致聽者躍躍。夫姦惡陰私。實係終身名節。一言偶失。殃累無窮。使其生則含羞。死猶遺臭。先人蒙垢。孫子懷慚。上干天怒。莫此爲甚。況又含沙嚙血。玷清白之芳名。吠影捕風。肆譏評而無忌者乎。若夫傳奇小說。多屬子虛。雖意取譏時。理含警世。而上智難概。中下爲多。披覽之餘。動心失性。則人人之孽。皆其孽矣。普望自覺之餘。更思覺世。吐舌上之青蓮。揮案頭之彩筆。表章感應。救拔淫迷。或廣坐危言。或密室苦口。毋畏擲揄。毋憚迂腐。宛轉勸導。必使聽者大發深省。於以迴蛾眉伐性之狂瀾。施錦陣回頭之良藥。豈非所謂愛人以德。自求多福者哉。至於貞淫果報。不爽分毫。古人詳矣。茲不及載。

防淫五械篇 同善錄

清陸幹

遏淫之說。古聖賢屢垂明訓。載之簡冊者。不下數千萬言。世有好學之士。亦既知之。

深而信之篤矣。雖然有不知不信而犯者。有知之信之而亦犯者。何則。立志不堅而外物得而奪之也。夫服藥者。治病於未萌。病已及而悔之。不殞其軀者鮮矣。蕉窗十訓曰。未見不可思。當見不可亂。既見不可憶。孚佑帝君以爲爲上等人說法。復更其說曰。見而忍之。起而遏之。犯後戒之。嗚呼。至矣。然而悅色之念。本自生初。彼中無執持者。每以風流豔冶爲可欣可羨之端。是先入已爲之主。雖或閱善書。談因果。正念時一現前。亦過而不留。入而不化。既見則赴之不暇。何能忍。既起則助之不暇。何能遏。卽明知其當遏。當忍。而平日既無強毅不拔之操。當境焉有堅固不搖之氣。於是敗於臨事。悔於既事。犯者思戒。戒者復犯。其流極靡所底止矣。余深哀沈溺者之迷而不悟也。爲定遏之忍之之法。舉人所易忽易犯。使淫欲之機潛滋暗長而不悟者。而禁絕之。名爲五械。藉以束縛其身體。箝制其心思。械者戒也。挾持之不得動也。一曰心械。二曰目械。三曰耳械。四曰口械。五曰足械。願同志者共勉焉。凡事皆從心起。心定則不搖。心械有三。一曰多看善書。諸語錄中。貞淫果報。必須時時翻閱。深信不

疑。凡書房寢室中。又須各置一二部。隨處隨看。邪念不能入也。二曰戒閒想。天地鬼神時時鑒察。暗室屋漏。刻刻提撕。每日勤理正務。閒想自無。蓋心勞則向善。逸則思淫佚也。三曰勤記功過。過功格中。色慾一條。宜格外嚴密。日日登記。不可記者。弗敢念也。人之爲美色動者。皆以目起。故顏子克己之目。以非禮勿視爲先。蓋杜絕外緣。此一關最爲喫緊。目械有五。一曰勿偷覷婦女。偷覷者。淫相之顯著也。不獨窺簾穴隙。端士弗爲。凡入人室。見有婦女真容。閨中喜照。亦宜禁目弗視。以杜邪思。二曰勿看淫書。淫書留之則害一家。貽之人則害天下。凡有所見。急付祝融。焚書一卷。記十功。燬板一部。記千功也。三曰勿看花紙。近日畫家。以祕戲圖雜入市。中壞人心術。莫甚於此。其次者。則舉古今風流事迹。描畫成章。雜以淫豔歌詞。觀之令人蕩心失志。殊堪痛恨。四曰勿閱新豔詩詞。詩以思無邪爲宗。大家自有正軌。足資諷詠。若夫南朝豔體。和相香奩。情之蠹而色之媒。年少豈容染指。詞家固不乏雅音。而綺靡哀怨之作。十居六七。無益性情。更可不必瀏覽。卽賦家之高唐神女。故實之偷香琴心。亦

何妨置而不論。縱有不知。無害其爲學士也。五曰勿看閒書。今人借說部爲消遣。較之著名淫書。雖遜一籌。然每一書中。必有數段描寫男女情緣。通體純潔者罕見。實爲引入邪僻之階。其最易惑人者。則紅樓夢也。他如記異叢編。傳奇雜劇。亦大半主於情豔。概以杜絕爲佳。以上諸書。盡惑少年子弟。造孽已自無窮。至唱本彈詞。出而穢褻之詞。直達閨闥矣。嗚呼。誰實作俑者。不見可欲。其心不亂。然以耳受者。不能禁也。耳械有二。一曰勿聽內眷談家事。談家事者。或曰某也賢。某也色。不過羨慕私衷。而在聽者。每致縈思。以一見其人爲快。是爲異日種一孽根也。二曰勿聽人談邪淫事。傳述此等事者。捕風捉影。多屬子虛。一則啓人淫心。一則壞人名節。實爲巨惡。自好之士。端宜避之如讎。能禁者。訶止之。否則間以他語。不能禁者。遠引去之。蓋不聞則已。聞則未有不動念者也。口爲禍所從出。我未聞而人述之。人未言而我銛之。皆牽惹之由也。故口械有二。一曰人家婦女賢否。勿問。賢否者。德性也。問德性必及容貌。問容貌必及貞淫。問者無心。而言者有意。已刺刺不可禁矣。二曰見人觀劇。勿問。

近日以淫戲爲佳趣。以優伶爲美談。遇人一間。則大暢詞鋒。與談論婦女無異。愛慕之心生。而佚游之念起。我弗之問。亦預絕外緣之一法也。外此有不必言語而亦宜從口戒者。曰不飲酒。酒之爲物。最易助淫。犯色戒者。半從醉後誤事。能禁絕之。則氣定神清。不致爲野狐所惑矣。足者。心之役也。心未動而足先起。故古人以靜坐爲學問。足械有五。一曰勿濫游名勝。名勝者。妖冶羣集之地。凡游山玩水。乃年高有德。借以怡養冲和。如蘇白二公。儒雅一時。風流千古。此非庸人所能學步。今則弱冠初基。動云適性。功名未就。慣說陶情。夫人當年少。修身立行。讀書爲善之不遑。而暇陶情適性乎哉。窺其隱微。不過問柳尋花。作採香之蜂蝶耳。二曰勿入戲場。戲場者。淫人淫事之淵藪也。三曰勿與迎神賽會。今之婦女。動以出頭露面爲大方。凡遇熱鬧場中。任途人注目熟視。毫不爲怪。縱在婦女百般修飾。未必有意惑人。而流蕩之子。已牽引於中而不覺矣。四曰探親勿輕入內寢。內寢衣裾脂粉。燦然並陳。偶爾關情。卽增意業。務宜峻自防維。非候疾急難等情。慎勿輕入也。五曰在家少入內室。易曰。男

正位乎外。女正位乎內。禮曰。晝居於內。問其疾可也。後人志氣昏惰。此義久不講矣。抑知暱近房幃。嫌疑無別。則一切敗行。瀆倫之事。往往出於其中。防微杜漸。務當循禮。勿謂家常居處。無須刻自防閑也。嗟乎。溺情牀第之流。心昏氣奪。賢遠佞親。有明知其果報之不爽。而不能改。明知其妻女之償還而不能改。明知其絕子嗣。削科名。減祿壽。而不能改者。急須守此五械。約束而強制之。使必無淫人淫事之相接。並無一毫淫機淫緣。流行於心目之間。而後已。久久行之。不械而自械。則聖賢之學。不外是矣。五械之大略如此。知其要者。一言而終。不知其要。流散無窮。世有以挂漏責余者。尤望大雅君子。匡所不逮云。此篇原文稍繁。故量加節刪。並爲修飾。字句變立。記

室欲說戒淫一則 元宰必讀書

清彭定求

太上曰。見他色。美起心。私之。並非實蹟也。又云。淫慾過度。並非外遇也。司命且隨其輕重。奪其紀算。淫之不可犯如是。至覺世經所載。行不善事。則以淫人妻女爲第一語其罪。又在盜賊殺人之上。讀之。令人毛髮悚然。汗流浹背。直是絲毫苟且不得。今

人才高學廣。而竟困窮以老。或爲官而僇辱其身者。試問於此。關果能守不貳色之戒否也。不知淫念不除。既有損於德。亦有傷於命。伊川先生曰。吾以忘身徇慾爲深恥。又曰。人待老而求保生。是猶貧而後蓄積。雖勤亦無補矣。昔李覺來謁蒲傳正。年已百歲。有同嬰兒。問其攝養之術。曰。某術至簡易。但絕慾早耳。包宏齋年八十八。精神老健。語賈似道曰。予有一服丸子藥。乃不傳祕方。賈欣然叩之。包徐曰。虧喫了五十年獨睡丸耳。道書云。人生慾念不興。則精神散於三焦。榮華百脈。及慾念熾然。精氣流溢。並從命門輸瀉而出。可懼哉。顧人之昏迷不悟者。病在幼而不讀朱子小學。以長其良心。長而不多讀經史。不多看善書。自古淫孽。未有顯不受慘報。無一人可以倖脫。彙纂功過格一書。實與經史相表裏。吾至老讀之不厭。而簡便易行。尤莫要於日誦感應陰騭。覺世諸文。使其念念不忘。常若天地鬼神昭布森列。觸目警心。安有復墮火坑之患歟。無如父不以是教子。師不以是教弟。日汨沒於時文。而卑陋已甚。此吾所痛哭流涕。長太息而不可解也。

戒色探源說

清王夔立

色欲爲生死根本。非蕩滌無餘。不能入道。其纏縛之因果。與斷除之方便。惟佛家爲能剖示精詳。若世諦諸書。則於義蘊不盡了徹。雖具婆心苦口。終覺尙隔一塵。未可相提並論也。余於此反覆有年。乃集經論之深切著明者。別爲四科。期與明哲共習焉。一示以貪著之妄。二惕以罪障之深。三列斷除之方。以便行持。四舉出世之要。以爲究竟。人苟能言下大悟。自求出離。將背塵合覺。無難爲淨土之歸。其於祛欲也何有。卽或未能出世。而道心漸熟。染心漸輕。亦必解脫有期。不致沈溺而不返矣。昔人云。世間嗜欲。禁得十分。不如淡得一分。此卽淡之之祕妙也。覽者勿以迂怪而忽諸。

一貪著之妄

悅色之念。與生俱有。世人以爲分所宜然。故趨之若鶩。抑知情枷愛鎖。僅在欲界之中。此外則色天以上諸凡。三果以上諸聖。雖境地懸隔。而翛然無欲則同。卽光

音降種之先。亦耦俱無猜。未有配匹之舉。奈何昧其本始。執假借四大之身。以相尋於穢濁乎。謹錄破妄諸條。以解塵中之惑。明眼觀之。可以廢然返矣。

法苑珠林曰。劫初成時。諸天來下。爲人皆悉化生。身光自在。神足飛行。無有男女尊卑。衆共生世。故名衆生。有自然地味。味如醍醐。衆生以手試嘗。遂生味著。漸成團食。故身漸堅重。光明隱沒。黑暗便生。日月衆星。從茲出現。地味便隱。復有地皮餅生。競耽食之。地餅復隱。復有林藤出現。競耽食。故林藤復隱。按此林藤卽樓炭經所謂兩枝葡萄也有非種香稻自生。衆共取之。以供所食。此食粗故。爲欲蠲除。便生二道。因斯男女根生。形相亦異。遂生非理。故有夫妻共住。其餘衆生。壽福行盡。後光音天來生此間。在母胎中。因此世間有處胎生。以上自無之有。爲最初入妄。按衆生以無明故迷。真遂妄因。執四大爲身。由有身故。遂起情欲。此自無而有之。謂諦也。但此意邊難披顯。故且就劫初事相明之。以期共曉。於此諦信。則亦可漸次求深矣。

月上女經曰。汝等昔或作我父。我或與汝昔爲母。互作父母及兄弟。云何於此生欲心。我或往昔殺汝等。汝等昔或殺我來。各作怨讎。互相殺。云何於此生欲想。

密嚴經曰。男女相貪愛。精血共和合。如蟲生臭泥。此中生亦爾。

梵網合注曰。淫者。污穢交遘。鄙陋堪恥。名非梵行。亦名爲不淨行。正是生死根本。楞嚴經曰。阿難白佛。我見如來三十二相。勝妙殊絕。形體映徹。猶如琉璃。常自思惟。此相非是欲愛所生。何以故。欲氣麤濁。腥臊交遘。膿血雜亂。不能發生勝淨妙明紫金光聚。

又曰。佛告富樓那。想愛同結。愛不能離。則諸世間。父母子孫相生不斷。是等則以欲貪爲本。貪愛同滋。貪不能止。則諸世間。卵化溼胎。隨力強弱。遞相吞食。是等則以殺貪爲本。以人食羊。羊死爲人。人死爲羊。如是乃至十生之類。死死生生。互來相噉。惡業俱生。窮未來際。是等則以盜貪爲本。汝負我命。我還汝債。以是因緣。經百千劫。常在生死。汝愛我心。我憐汝色。以是因緣。經百千劫。常在纏縛。惟殺盜淫三爲根本。以是因緣。業果相續。如是三種顛倒相續。皆是覺明明了知性。因了發相。從妄見生。山河大地。諸有爲相。次第遷流。因此虛妄。終而復始。

西方合論曰。業性卽法性。烏芻瑟摩聞多淫人。成猛火聚。却後遍觀四肢百骸諸冷煖氣。神光內凝。化多淫心。成智慧火。夫同一熱惱。方其淫。成大火聚。及其離。成大寶燄。若淫性實者。云何是中而得三昧。是故迷成則處胎獄。念成則入蓮胞。以上惑溺無理。爲現行逐妄。

梵網合注曰。六欲天子。別指欲界。一四王天。二忉利天。三夜摩天。四兜率天。五化樂天。六他化自在天。此六欲天。雖尙有男女五欲。而果報自然不假營求。故皆名天。按邪淫爲十善之壹。生天正因也。此等雖不能無欲而較之。人世輕重懸殊。以現果言之。亦爲斷除之漸。故列於初。

又曰。十八梵天。別指色界。一梵衆。二梵輔。三大梵。此三總名初禪。四少光。五無量光。六光音。此三總名第二禪。七少淨。八無量淨。九徧淨。此三總名第三禪。十福生。十一福愛。十二廣果。此三屬第四禪。凡夫所居。十三無想。亦屬四禪。外道所居。十四無煩。十五無熱。十六善見。十七善現。十八色究竟。此五亦屬四禪。三果聖人所居。此十八天。雖凡聖不同。皆離欲穢。得清淨定。故名梵天。按無色界四天一空處二識處三無所有處四非想非非想處並無色身。

所證愈高則更超然無欲例此可知

又曰。初果永斷邪淫。三果永斷正淫。乃至夢中不復失精。別教初住同初果。五住同

三果。圓教初信同初果。五信同三果。按初果即須陀洹。此翻入流。謂入八聖道之流。也。二果即斯陀含。此云一來。三果即阿那含。

此云不來。四果即阿羅漢。大論云。不生謂一切漏盡。不受生死果報也。又云。破賊破一切煩惱賊。故又云。應供。堪為人天福田。故聖位由三果進趨。四果斷見思惑。出生

死苦。是為十乘。再上即中乘大乘。菩薩再上即佛。是為極果。其藏通別圓四教所斷證及十住十信等名號階級詞繁不具欲求詳者當考教觀綱宗

選佛譜諸書三果已永斷淫機四果以上無之又無更可知矣

大般涅槃經光明徧照高貴德王菩薩品曰。菩薩摩訶薩修大涅槃微妙經典。為阿耨多羅三藐三菩提度衆生故。離淫欲心。以此善根。願與一切衆生共之。願諸佛土所有衆生。無有貪欲瞋恚癡心。亦無飢渴苦惱之者。以是誓願。因緣力故。於未來世成佛之時。國土衆生。遠離貪欲瞋恚癡心。一切無有飢渴苦惱。十住斷結經曰。有四億衆。自知死此生彼。牽連不斷。欲為之源。樂生無欲國土。佛言。西方去此無數國土。有佛名無量壽。其土清淨。無淫怒癡。蓮花化生。不由父母。汝當生彼。以上自有之